

Hainakuu  
18. päiv  
2019

Nummör  
14 (442)

Leht mass 0,50 €

# UMMA LEHT

VANA - VÖROMAA RAHVA UMAN KEELLEN LEHT

**Tagamõtsa Tarmo: päält ülikuuli naksi suidsusannast arvu saama**

Kae lk 2

**Perrä proovitu: massulda bussõga saa reisi külh**

Kae lk 3

**Kuimuudu pääsläse hindäle vahtsõ pesä sai**

Kae lk 4



## Teedüs Uma Lehe lugõjilõ

Hää Uma Lehe lugõja! Vanal Vöromaal postitõdas Umma Lehete postkasti massulda, a ekkä postkasti lehte ei jakku. Üten Omniva postituspiirkundõ muutumisõga 1. põimukuust ja lehe-toimõndusõ tettü jaotusõ täpsustämiseiga tulõ muutuisi ka Uma Lehe postitamisõ man.

Suurõmba muutusõ pututasõ Setomaa ja Valga valda. Setomaa vallan Umma Lehte 1. põimukuust massulda inämb ei postitõda. Valga vallan postitõdas lehti väega veidü. Väikumba muutusõ omma ka muial piirkundõn.

Hää lugõja! Ku tahat Umma Lehete egä katõ nädäli takast umma postkasti saia, sis kõgõ kimmämb viis om taad lehte telli. Lehte saa telli ExpressPostist, internetin aadrõsi [tellimine.ee/umaleht](mailto:tellimine.ee/umaleht) päält vai telefoni 617 7717 päält. Uma Lehe aastateline mass 12 eurot, e-arvõ püsimummassulepinguga 0,85 eurot kuun.

Uma Lehe telmine and sullõ võimalusõ ütten avita võrokeelitse aokirändüse tegemisele. Uma Lehe teljä om iks kõgõ kursin tuuga, miä võrokeelitsen ilman tähtsät sünnüs.

Aituma kõigilõ, kiä joba omma Uma Lehe teljä. Ja vahtsõ teljä, olkõ terve tulõmast Uma Lehe teljide perre!

RAHMANI JAN, Uma Lehe päätoimõndaja

## Harglõn peetäs üülaatu

20. hainakuu õdagu alostusõga kell 20 peetäs Harglõ kooli bussipiätüse lähkül mõtsan üülaatu nimega «Kotussõ uma üülaatu». Laadu pääle tulõva käsitüimeistre, kiä mõõvä umma käsitüüd ja näütäse ja oppasõ tuud, midä mõistva. Valla teetäs ka mõtsakohvigu, kesküüse saa kullõlda kontsõrti. Ligemb teedüs internetist: [kotus.ee](http://kotus.ee).

## Suurõ pido Vörol ja Põlvan

Nigu iks, om ka timahava suvõ keskpaigan hulk suuri ettevõtmüisi, kon huvilidsõ saava ütten lüvvä.

18.–21. hainakuuni käü Vöro liinan ja maakunnan Vöro perimüstandsu festival. Seokõrdsõ tandsupido päälkiri om «Veeränd pöõret». Et säänest pito peetäs joba 25. kõrd, tähistetäs pido ümärniku tähtpäivä.



Krabi külätüatri naarut kaejit vahtsõ tükuga. 13. hainakuul tull Paganamaa päivi kavan edimäst kõrda lava pääle Krabi külätüatri vahtsõnõ tük «Pordumaja». Nigu Krabi tüatri õks, om tego võrokeelidse nalatükuga, muinasjutuga, minikal om õnnõlik lõpp. Luu autor ja lavastaja om külätüatri vidäjä Mürgü Marje.

KONTUSÕ MARGUSÕ piit

Ligemb teedüs ja kava internetin: [vorufolkloor.ee](http://vorufolkloor.ee).

Puulpäävä, 20. hainakuul peetäs Põlvan lõõtspillipito Harmoonika. Seokõrd omma kullõjidõ siän delegatsiooni 28 Euroopa riigist ja üles astus akordioniorkestri Trappenkamp Saksamaalt.

27.–28. hainakuul peetäs Vöro liinan Vöro latsifestivaali. Teedüs vorulastefestival.ee kodolehe päält.

## Talo tegevä jäl uma ussõ valla

Timahavanõ üle-eestiline vallaliidsi talodõ päiv om 21. hainakuul. Et Vana-Vöromaa om timahava Eesti söõgipiirkund, sis om ka talodõ päävä vallategemine seokõrd Vöromaal Tiri külän Maamehe Golfi talon. Tuud, määndse talo külälüidsi uutva, saa kaia internetist kodolehe [avatudtalud.ee](http://avatudtalud.ee) päält.

UL

## Paganidõ üü-ülikuul

RAHMANI JAN

**Riidi, 12. hainakuu nakkas tassakõistõ õdagulõ saama. Pähni külän RMK keskusõ väleõpihuunõn alostas pääle üü-ülikooli avalik ülesvõtminõ, kon Kõivupuu Marju kõnõlõse paganist ja Tuksami Jaak laul jutu vaihõlõ ummi laulõ.**

Üü-ülikuul om päämidelt raadiosaatidõ sari, midä 2000. aastagast pääle toimõndas ja kõrraldas Tootseni Jaan. Päält raadiosaatidõ om üü-ülikooli nime all tettü telesaati. Seokõrd võetas jutt üles raadio jaos. Et parasjago omma pääle naanu Paganamaa päävä ja üü-ülikooli ülesvõtminõ om üts osa päivi programmist, om loenguteema kah paganidõ ja paganlusõga kõõdet.

Kell saa 9 ja lektori läävä klassiruumi ette. Tuksami Jaak ütles, et timä suurt ei kõnõlõ, hoobis laul. Kõivupuu Marju tuu-iist lupa hulga kõnõlda. Klassiruum om kullõjit parasjago täüs: inämbüste paiklik rahvas, a kullõjidõ hulgan om ka vanapagana muudu pistü hiussidõga üü-ülikooli püsükullõja Johanson Jaak. Ülesvõtminõ või pääle naada.

Üü-ülikooli vidäjä Tootseni Jaan ei olõ seokõrd esi tul-la saanu, timä iist and umal vaiksõl viisil kõrralduisi timä veli Tootseni Tõnis. Paar sõn-na sissejuhatusõs, et telefoni tulnu vällä lülitä, ja sis laul Tuksami Kaalepi Aini sõn-nu pääle tett lauluga «Sääne miis» õdagu valla. Laul om avalaulus valitu tuuperäst, et tuu om ainus Tuksami laul, kon paganit nimmatas.



RAHMANI JANI PILDIT

Seokõrdsõ üü-ülikooli lektori Tuksami Jaak ja Kõivupuu Marju klassi iin...



...ja tenoligu kullõja klassiruumin. Jutt käü paganist ja Paganamaast.

Niisama äkki, ku Tuksami laul pääle naas, saa tä ka lõpu. Lektor Kõivupuu Marju ei lasõ vaikust majja, tä nakkas õkva jutuga pääle. Saami teedä, et kural jõul om olnu esisugumaidisi nimmi, et sõna «pakan» olõ-i eesti keelen väega vana sõna ja et Paganamaa ei olõ kah taa Trumbipalu

mõtsa väega vana nimi. Kõivupuu jutt juusk, nigu tä esi kitt, 100 sõnna minotin. Kõlama jääs mõtõ, et asa ei olõ kõgõ nii, nigu nimä paistusõ. Ka üts ja sama asi või esi inemisi jaos tähendä nii hääd ku halva.

Niimuudu – jupikõnõ Kõivupuu Marju juttu ja sis üts Tuk-

sami Jaagu laul vaihõlõ – taa õdak lätt. Puultõistku tunni lindas nigu kipõ tsirk ja lõpus jõudva esinejä sinnamaalõ, et ka Tuksami Jaak ütles mõnõ sõna sekkä ja Kõivupuu Marju laul paar laulurita ütten. Sis om õdak otsan. Jääs viil üle raadiosaadõ är uuta.

## Mooste kandin tulõva suidsusannapäävä

RAHMANI JAN

**1.–4. põimukuuni peetäs Mooste mõisa ümbre suidsusannapäivi, miä om muusigaetendüse «Suidsusannasümfoonia» lisa-programm. Sannapäivil omma valla suidsusanna, tetäs sannakütümise ja vihategemise tüütarrõ, saa näütüst kaia, piitõ tetä, loengut kullõlda, huvireisil kävvü ja hulga muud tetä.**

«Kõrraldami suidsusannapäivi tuuperäst, et savvusanna

näüdädä ja avvu sisse nõsta. Et inemise tiidnü, mis vara näil kotoh om ja et külälidse saanu sannakultuurist inämb teedüst,» kõnõlõs suidsusannapäivi programmijuht Vodi Egle. Sannapäivi huvireisi veevä Mooste kandi sannu mano ja säääl antas teedüst tuu kotsilõ, kuimuudu suidsusanna ehitetäs. Suurõmba sannahuvilidsõ saava suidsusannapäivi aigu sannan kah kävvü. Kokko om sääne võimalus üttenõistkümmen sannan, noist säidse omma hariligu perresanna ja neli turismitalosanna. Inämbüs san-

nust om Mooste lähkül, a üts ka kavvõmbal. Vodi Egle seletäs, et egä sann om ummamuudu ja egän paigan omma ka uma sannakombõ. Tä kuts külälüidsi üles ka sannapererahvast avustama. «Sanna minejä võinu rehkenä tuuga, et lätt töõsõlõ küllä. Ku Vöromaal mindäs küllä, võetas ütten küläkosti, oldas pererahva vasta viisakas. Ja lüvväs ütten tollõh, mis pererahvas pakk: om tuu sis mõni talos vai muu kõrraldus. Ja uma kätärätt tulnu kah ütten võtta!» Vodi Egle seletäs, et suidsusannapäävä omma mõtõldu

perrile, sõprulõ, sõpruskundõlõ. Ka latsõ omma suidsusannapäivile oodõdu. Osa sannapäivi tegemisi om raha iist, tuuperäst mass täpsempä kavva uuri kodolehe [savvusann.ee](http://savvusann.ee) päält. Lisas omma osa tegemisi säändse, kohe piät hinnäst varrampa kirja pandma. Nuu omma huvireisi ja sannankäümise. Ligembät teedüst and ja kirja pand Vodi Egle, tel 516 6684, e-post [egle.vodi@gmail.com](mailto:egle.vodi@gmail.com). Vana-Vöromaa suidsusannakombõ omma UNESCO üleilma tähtsät kultuuripärändüse nimekirän.



# Massulda bussiga tõistõ Eestimaa otsa

RAHMANI JAN

**Kildakõisi Eestimaa reist, miä suurõlt jaol massulda bussõga ette sai võetus. Plaan oll jõuda Narva vällä ja niimuudu läts kah. Kuigi mitte peris massulda bussõga.**

Jaanipäiv om õkva läbi saanu ja kiäki nigunii suurt tüüd ei tii ja midägi ei taha. Otsustami naabrimehega varasta paar tüüpäivä ja ütenuun latsiga väiku reisi ette võtta. Massulda bussõga, järveviirt pite Kärkulast Narva.

\*\*\*

Ei olõ mi väega suurõ plaanja. Paar kõrda hinnäst kokko võtta ja midägi paprõ pääle saia paistus küländ suur vaiv. Tegünes mõtõ osa maad laivaga sõita. A laivamehe omma kinni vai om määnegi muu häädä. Tulõmi tagasi bussõ manõ.

\*\*\*

Hummogu kell 6.35 astumi Kärkula küläst busi pääle. Meid om kuus, kats suurt, neli last ja hulga kompsõ. Edimäne sõit Võrolõ lätt ilosah plaani perrä. Võro liinan om puul tunni aigu, teemi tuu parras bussijaaman. Ja et mi määnestki õkvaminekit ei kannata, otsustami, et edesi

lätt sõit hoobis Verska sanatooriumi poolõ. Sinnä lätki poolõ tunni peräst tühi massulda buss.

\*\*\*

Verska buss sõit tunni aigu niimuudu, et pääl olõmi mi kuvvõkõistõ. Bussijuhi jutu perrä om suvõl tihtsäle nii, et sõitjit ei tulõki. Siski: inne Verska liina tulõ Reha bussipiätüsest pääle üts miis. Nimmami tedä tan ja edespäite Reha mehes. Reha miis lätt Verskan maaha.

\*\*\*

Verska sanatooriumin saami hinnäst sisse osta hummogusõõgisaali. Ku kõtt hääd-parõmbat täüs, om aig vii viirde minnä. Sääl sünnüs edimäne ja kõgõ tähtsämb tähelepanõk suvõtsõ latsiga reismise kotsilõ: ku om hääd ilm ja liiv rannan, võiva latsõ tuu liiva seen tunnõ viisi kiusamalda mängi. Mi mängutunni lõpõtas lõunanõ Rāpinā buss. Om aig paar tunni Rāpinā bussijaaman lõunat süvvä ja täpsempi plaanõ tetä.

\*\*\*

Et mi Tarto liina kuigi minnä ei taha, tulõ kuigimuudu Imājõõst üle saia. Olõmi kostki kuulõnu, et Kavastun sõit praam üle jõõ. Jäämi tuu pääle luutma ja tulõmi Parveotsa bussipiätüste. Üts häädä viil: Kavastust ei saa samal pääväl ināmb bussiga edesi Koosalõ, kost sis sõita bussiga edesi Varnja lähküle Kasepää küllä, kon edisi



EPLERI RAINI PILT

**Kallaste rannan om latsil kodoikäv pääl ja nä kirotasõ liiva pääle kivvega uma kodokülä nime.**

mane kokkokõnõld üümaja meid uut. A mi häädä saava esihindäst kõrda: Kavastun sõit tõtõstõ praam üle Imājõõ ja Moõovihu kaudu om üts miis nõun meid autoga Koosalõ viimä. Nii jõvami plaani perrä üümajalõ kirānik Afanasjevi manõ, kiä esi kah poolõ üü päält kodo jõud.

\*\*\*

Tõõsõ päävä hummok kisk meid jälki busi pääle. Kasepäält Kal-

lastõlõ ja säält õkva edesi Mustveele, om mi plaan. A jumalal omma tõõsõ plaani. Tulõ vällä, et edesibuss lätt viil vasta õdagut. Piāmi terve pikä päävä Kallastõn vahtma. Mis muud ku randa! Tsi-pa tibutas vihma ja matal Peipsi lainõtas. Latsilõ tulõ kodoikäv pääle, nä kirotasõ kivvega rannaliiva pääle kodokülä nime. Lövvāmi Kallastelt üte kalakohvigu, miä vihma iist varjo pakk. Vinütāmi säält ja väiku

\*\*\*

Mustveel saa selges, et edesi massulda bussiga ei saa. Vai arvada saanu külh, a sis võtnu Narva jõudminõ hulga aigu. Meil om õdagus kokko kõnõld üümaja Narva viihõitja kaldõ pääl, naabrimehe kavvõ sugulasõ Ženja man. Istumi busi, miä sildil perrä Võrolõ sõitma oll naanu, ja mõtlõmi, et hääd iks om

tornimatka pääl bussiaoni är.

tsiiruga sõita ja õkvasõit olnu ikäv. Paari tunni peräst olõmigi Narvan.

\*\*\*

72aastanõ Ženja om meil uma väiku Fordiga vastan. Mahumi sinnä säitsmekeisi ja suuri kottõga ilostõ är. Suvilarajoonin kamandas Ženja hindä naasõ, kedä Babuškaskuts, lauda katma. Istumi ja jutustami. Ei, Ženja ei kurda. Om seene- ja mafakorjaja, vanast oll kalamiis. Sõitsõ iks paadiga, a no om paat maha müüdü. Ehitās, kuigi tervüs ei olõ ināmb tuu.

\*\*\*

Latsi jaos om kõgõ suurõmbas läbielāmises välākemmerg, midä ei valva mitte vasigu-, a õhvakõsõsuurõnõ pini. Tuu om kemmergu aknõ purus presnū ja tsuskas vahepääl pää kemmerguhe, nii et puul ruumi tuud pääd täüs saa. Pini om kuri, esierānis latsi pääle.

\*\*\*

Tagasi sõidami Narvast rongiga. Tüüasa tulõva pääle ja ei lasõ ināmb mustlasõello ellä. Võinu jo kirotā ka tuust, kuis meil ütenu olnu karmoška tagasitii pääl är kaos ja politsei ja rongifirma tuud otsva, a leheruum saa otsa.

1.-4. AUGUST 2019

SUIDSUSANNA-

PÄÄVÄ'

„SUIDSUSANNASÜMFOONIA“  
AOL TETTÄV PROGRAMM  
MOOSTE MÕISAN JA MUIAL  
VANAL-VÕROMAAL

VALLALÕ SUIDSUSANNA', TÜÜTARÕ',  
HUVIREISI, VIRTUAALREAALSUS, LOENG,  
NÄÜTUS, KOHVIKU', MEELUSSIDE MÜÜK

WWW.SAVVUSANN.EE

KÕRRALDAS VANA-VÕROMAA SUIDSUSANNU KUUNTÜÜKOGO

TEL 5166684

WWW.SAVVUSANN.EE



DIRIGENT KASPARS PUTNĪŠ  
LAVASTAJA TARMO TAGAMETS (RAKVERE TEATER)  
KUNSTNIK LIISA SOOLEPP  
ESITÄSE MARI KALKUN, MEELIKA HAINSOO,  
LAULI OTSAR, STEN KARPOV (ENDLA TEATER),  
AGU TROLLA, EFK JA ERSO MUUSIKU

MÄRT-MATIS LILL

SUIDSU-  
SANNA-  
SÜMFOONIA

EESTI FILHARMOONIA  
KAMMERKOORI  
MUUSIKALAVASTUS

2. ja 3.08 kell 19, 4.08 kell 16  
Mooste Folgikuan  
Pilet 20/25 € Piletilevin.  
Teedüs www.epcc.ee

# Hädäh nigu Pondso Jakob pääsokõisiga

PABORTI DAISY

Niiviisi üt' üt' mu tutva meesterahvas kõgõ, ku tal mõni tüü es edene.

Ütsäkümnevide aastidõ algul olle tüükotussidõ saamisõga küländki rassõ. Kuigi-muudu olli ma hinnäst saanu sokuta üt'te virmahatõ, koh olli-va keskmädeh nuurusõh inemise tüül. Läbisaaminõ olle umavahel hää. Pääle tüütegemise peeti vahepääl üt'ehkuuh sünnüpäivi vai muid pidosid. Nigu sõs kombõs olle, olliva nuu pido tihtipääle tüükotussõh. Koskil hainakuu algusõ poolõ olle katõl meesterahval ligistikku sünnüpäiv. Nimä es viisi tüü man vällä tetä ja panniva ette, et teemi üt' pido- lidsõ lõunasõogi Üükullih. Üükull olle tollõ ao kotsilõ peris peenikene söögikotus. Söögiportso olliva suurõ ja hää ja teenindüs es jätä suuvi.

Kõgõ korgõmbat ülebät es olõ kodomail ja nii ollegi hiiril pido, ku vanna kassi es olõ kotoh. Lätsime Üükullih, seime, võtime veitse napsi, ajasime tõsitsit tüüjuttõ ja nisama lori. Paari-kolmõ tunni peräst saie pido läbi, kellel viil midägi olle tüü man tetä, lätš tagasi tüüle. Mul sai tollõ päävä tüü tettüs ja naksi tassakõistõ kodo poolõ astma. Kõtt olle kõrralikult täus ja mõnus summin pääh. Mõtlõ, et lää kodo ja tii hindäle hää ärõlõmisõ. Vis-ka tunnikõsõs pikäle, loe lehte ja suigu veidükese. Ku üles tulõ, nakka ummi kodotõid tegemä. A tutkit brat.

Vaivald sai ussõst sisse, ku poig ja latskõnõ joosiva hõisuh vasta, et imä-imä, pääsokõisi pesä sattõ alla.

Mi ellime katõkõrdsõ maja tõsõ kõrra pääl otsmadsõh kortõrih. Maja mipuulsõhe otsa olle ehitet üt' kuurimuudu ehitüs, mille kaartõviir olle mi rõdu ülemäde veerega tasa. Sinnä kaartõ ala olliva pääsokõsõ uma pesäkese tennü, piazõ rõdu ülemäde-



REIMANNI HILDEGARDI TSEHKENDÜS

se nuka ligi. Pesä jäi hummogu ja varahadsõ lõunapäävä poolõ. Paistu, et puusain näile miildü. A või-olla tuu saiegi näide ehitusele saatustlikus, selle et puu es võta pessä nii kõvastõ kinni nigu näütuses kivi vai krohvõ sain.

Mi pidäsime noid pääsokõisi nigu umis kodotsirkõs, umavahelinõ läbisaaminõ olle meil väega hää. Pääsokõsõ es panõ tähelegi, ku ma rõdu pääl mõsu kuioma säi vai midägi sinnä panni vai säält võti. Vahepääl isti ma säält aiatoolih ja loi vai tei näpotüüd. Nimä asätiva rahulikult ummi asjo. Ega näid es sekä tuu kah, ku rõdu-uss vallalõ olle, televiisor vai raadio tarõh mängse vai mi esi juttu aimi. Latsõ olliva kah är karistõdu, et rõdu pääl es tohe rüüki ega kipõsit liigutuisi tetä.

Pääsokõisi tegemiisi olle ilmatu illos kaia. Näide tüüpäiv alosõ õigõ varra päävä nõsõmisõga ja kestse hämärani. Kipõstõ-kipõstõ lasti linnutsõõrõ

pesä ja taiva vahel. Vahepääl puhati siibõ, istuti katusõveere vai elektritraatõ pääl ja lasti umma lauluvidinät. Hindäl kinä musta-valgõ lahkidsõ hannaga kuhti sälan. Ja nüüt juhtu näidega säändäne õnnõtus.

Lätsime vällä pääsokõisi pesä ala. Pesä maah mis maah. Õnnõs es olõ väega katski lannü, üt' nukk olle külest är tulnu. Kõrralikult ehitet. Mis kõgõ kurvõmb, üt'eh pesäga olliva kolm poiga kah maaha sadanu. Nimä olliva joba säändseh suurusõh, et nädäli-paari peräst võinu lindama nakata. Pojakõsõ aiõva nokkõ vallalõ, vet hirmust ja kõtukõsõ kah tühä. Vana tsirgu lindsi mi päie kotsil ja vidiiditivä väega hallõlt. Ega hindälgi tulõ ikk silmä sisse.

Korssime poja üt'eh pesäga üt'te kangäkarpi. Latsõ püüde- sevä kõõgi aknõ päält kärbläsi ja pakiva näile. Es taha nä noid süvvä. Kost mul nuu tiidmise, midä säändsõde väikeisi tsirkõga pääle naada.

Mu vanamiis olle tüül, tuu vast olõssi avitanu midägi vällä märki. Tulle uma pää tüüle panda. Leidse savrist üt' vana vineerist soolavaka. Säändse ripnivä tollõl aol vast egäh kõõgih. «Suul» olle pääle kirotõt. Lõiksi vaka edimäde küle keskele väidsega väiko kaarõ, et pääsokõsõl olõssi parõmb sisse linnada. Kaasõ võti vaka päält är, selle et ega näide pesäl kah katust ei olõ. Sis võti nagla ja vasara, anni nuu latsi kätte, esi ronisi rõdu pääl tooli otsa, kost ma küünüti tuud vällämõtõldut pessä üles pandma sinnä, koh pääsokõisil peris pesä olle. Naistõrahva asi, maadli mis ma maadli, korgõh olla kah, a nagla sai saina ja kunstpesä sinnä ripnõma. Panni sis peris pesä tükü kah sinnä ja pääsokõsõpoja kõgõ otsa. Vana pääsokõsõ linnõlsiva iks ümber mu pää, ku ma säält asati.

Sõs lätsime esi latsiga tarrõ, istime säält hõngu kinni pidäden, et mis saama nakkas. Ja oh toda häädmiilt! Üts vana tsirk linnasõki vahtõhe kodo poigõ mano. Kaiõme tükk aigu, et kas olle üt'sainukõnõ lindaminõ. Huvitav olle kaia, kuis näide linnutsõõri olli edimält veitse kandilidsõ, a päiv-päävält asi parasi ja sis lasiva joba nigu vikur-linnugi. Sügõsepoolõ katõva nimä ülepääl är, jo sis kogosiva parvihe, et hafõta Egiptimaalõ minekit.

Tuust aast pääle kae iks üles taivahe, kui mõni pääsokõnõ lindas, ja mõtlõ, et ei tiia, kas om mi pääsokõisi sugulanõ.

## Parm tsuskas

Nalapildiga tsuskas ütiskunda mõnõst hellembäst kotussõst Rõugõ Rebäse külä miis VARUSTINI ANDRES, tunnõt ka nimega PARM.



## Tossu Tilda pajatus

### Silmärõõm

Üts õdak võtsõ keskiän peresä, kinkal latsõ suurõ, jutus uma nuurusõao.

«Mullõ miildü väega Tiina. Ma olli kah joba suur miis ja mõtli Tiina hindäle naasõs võta.» alosõ peresä umma juttu. «A sis tull üt' tõõnõ miis ja võtsõ mu silmārõõmu mu nõna iist är!»

Kõnõlõja ohaõ sügäväle. Jupi ao peräst lätš jutt edesi, mehe helü lätš kah rõõmsambas. «Niimuudu olõgi kõgõ parõmb, Tiina oll mu jaos tsipa vana.» arof nuurusõaigõ miilde tulõtana peresä.

Edesi kõnõldõn tull vällä, et kõnõlõja, hindä meelest suur miis, käve latsiaia perämädsen rühmān, a timä silmārõõm oll säält kasvataja.

## Muda Mari pajatus

### Olkõ valmi, sehvi tulõva!

Ma kuuli raadiost, et põllumiisihõ elo lätš kerembäs. Vähämbält siih kandih piä-i inämb murõhtama, kost suvõl kipõl tüüaol tüütegiit leüdä. Ku kaabuga ministri taht är keeldä Ukrainast tulõva maaskidõ ja kurkõ korjaja, sõs no tulõvagi appi riigiamõtnigu. Ka seo aasta saat riik uma ammõtnigu vällä tüüle. Seokõrd sõs Kagu-Ees-

tihte, koh omgi pallo põldõ ja veidü inemiisi.

Ma mälehtä küll sovhoosi-aigu, kuis sehvi tuudi liinast appi kardõhkit võtma. Tüüd sai kah iks tettüs, a kõgõ põnõvamp oll tuu tsärrin, mis külä pääle tekkü. Kuu aigu oll nii miihil ku naisil põhjust hinnäst hummogu vurhvi lüvvä, et liinast tulnuilõ sehvele silmä jäää. Nii et olkõ valmi, pia tulõ maalõ värskit verd!

MUDA MARI

**Kaika suvõulikooli matkapäiv**  
peetäs puulpäävä, 10. põimukuu  
Vana Võromaa põhatipun Meerapalo kandin.  
Päävä kavva saa kaia  
Võro instituudi kodolehe **wi.ee** päält.

### Telli Uma Leht!

6 kuud – 6 €,  
12 kuud – 12 €,  
e-arvõ püsissaleping 0.85 € kuun.

Telli saa ExpressPostist:  
tellimine.ee/umaleht,  
tel 617 7717.

## Latsilõ

Vastus saada üt' nädäli joosul meiliaadrõssi pääle latsinukk@umaleht.ee vai postiaga:  
Uma Leht  
Tartu 48  
65609 Võro.

Vastussõ mano panõ' kirja uma nimi, vannus ja kimmähe ka postiaadrõs.


Vastajidõ vaihõl loositas vällä võrokeelitsit latsiraamatit vai plaatõ.

Latsinukka tugõva' Võro Instituut ja Võro selts VKKF.

Minevä kõrra vastus om LÜVVÄ'.

Avvohinna saa SULÕ LAUR-ROBERT (13) Laatrest.

Lahenda' är' ristsõna! Vastussõs saat teedä' üt' esieräligu maranime!



SAARÕ HIPÕ TSEHKENDÜS